

DISSERTATIO INAUGURALIS MEDICA,
DE

MEDICA CHIR- URGIA IN GENERE,

QVAM

RECTORE MAGNIFICENTISSIMO,
SERENISSIMO PRINCIPE AC DOMINO,

DN. FRIDERICO WILHELMO,
PRINCIPE BORUSSIÆ, MARCHIONE BRAN-
DENBURGICO, RELIQUA,

GRATIOSO FACULTATIS MEDICÆ CONSENSU
PRÆSIDE

DN. GEORGIO ERNESTO STAHL,
CONSIL. AUL. ET ARCHIAT. REG. MED. ET RERUM NATU-
RALIUM PROFESSORE PUBL. ORDIN. ACAD. NAT. CUR. COLLEGA LON-
GE DIGNISSIMO, DECANO h. t. SPECTATISSIMO,

DN. PATRONO, PRÆCEPTORE, AC PROMOTORE SUO
omni Observantia atque Honoris cultu atatem prosequendo,

PRO GRADU DOCTORALI,

Summisque in Arte Medica Honoribus, Insignibus, ac Privilegiis
More Majorum solenni obtinendo,

Ad d. Jul. MDCCXIII. horis ante & pomeridianis

IN AUDITORIO MAJORI
Publico Eruditorum Examini submittit

CHRISTIANUS FRIDERICUS ECKSTEIN,
BEROLINENSIS.

HALÆ MAGDEBURGICÆ,
Typis CHRISTIANI HENCKELII, Acad. Typogr.

DISSEMINATED IN THE MEDICAL

ALBION & CO.

THE

DR. GEORGE W. W. STALL

THE

CHASTING & CO.

THE



PROOEMIUM.



Vantus, & quanti mo-

menti, passim vigeat abusus, in exercenda praxi Medica, adeò in ipsum usque vulgus notum est, ut prolixioribus verbis ad orandam hanc causam, nullatenus opus esse videatur. Neque verò

etiam in notanda illa ataxia, tempus atque verba perdere, sedet animo, quomodo multi medicandi licentiam temerè sibi sumant, non solum numerosis drastis præparatis, aut inanibus titulis & pollicitationibus, frustra phaleratis medicamentis; sed etiam, mulieres, & de communi plebe, euporistis, aut per manus traditis specificis, cœcâ fiduciâ insistentes: sed subit hâc vice animum propius, illorum male collocatam industriam, sciolam solertiam, & familiarissimè temerariam audaciam, brevibus notare, qui propiorem occasionem nacti, morbis & personis ægris, in suo ordine debite succurrendi, protervè transiliendo suæ vocationis limites, licentiam hanc medicandi confidentiùs sibi sumentes,

aliquando quidem omittendo, quæ verè utilia imò necessaria erant, agris pessimè consulunt: longe familiarius autem committendo varios errores, & temeraria experimenta prosequendo, è malo in deterius, imò non rarò in pèssimos planè effectus & eventus, eosdem conjiciunt. Neque tamen iterum, camarinam illam, pharmacopœorum atque seplasiariorum multorum audaciam, hic movere placet, cum certè Augiæ illud stabulum aggredi, Hercules quidam videatur labor: sed suffecerit Chirurgorum confidentiam perstringere, quæ tales, uti sinceram appellationem Germanam veri sui officii, (quamvis certè imprudentissimè, dummodo illam decenter tueri valeant,) graviter averfantur; ita tanquàm solido illa jure possessionis acquisito jam pridem potiti, adeò agrè ferunt, in hoc negotio circumferibi aut coërceri, ut tanquàm pro aris & focis dimicare, non erubescant, si ipsis in hoc genere quæstio status moveatur, & vel abusus solum, nedùm ipsius usus possessio, ejusque bona fides, in dubium vocetur. Quæ tamen res, cum omnibus modis, non tam altercatione atque disceptatione cum hominibus duræ frontis & cervicis, digna sit, quàm veriore potius, & bene fundatâ deductione atque demonstratione; visum est nobis operæ pretium, ad minimum in genere, quæ ad hoc negotium pertinent, evolvere, & quid circa illud jus atque fas sit, enucleare. Placuit itaque, cum IN-AUGURALI DISSERTATIONI constituendum esset Thema, hanc ipsam rem huic scopo destinare; nempe de MEDICA CHIRURGIA IN GENERE, quæ consideratu maximè digna sunt, pertractare.

Quod

Quod ipsum dum in effectum deducere laboramus, ante omnia divinæ gratiæ præsidium humillimè exoramus, ut quæ scitu omninò hîc sunt necessaria, rectè & perspicuè proponendi dexteritatem, clementissimè nobis largiri dignetur.

Thef. I.

MEDICAM CHIRURGIAM IN GENERE adumbrare, dum nobiscum constituimus, necesse ante omnia erit, de verâ vi & significatu hujus appellationis, tanquam succinctâ descriptione, conceptum perspicuum exhibere. CHIRURGIÆ quidem nomine, simplici vocabuli significatu, *manualem operationem* seu *manuum opus* denotari, perspectum habent, qui vocabula græcæ linguæ didicerunt. Ubi, quicquid cum fastu indignentur, hanc dexteritatem exercere professi, ne illa *Germanis* oculis *eines Handwerks*, ut ipsi quidem interpretantur, dehonestetur; tamen facile intelligere possent, quam parum dignitati suæ, (dummodo solidæ peritiæ,) decederet, si modo distinctionem *prærogativæ*, tam *subjecti*, circa quod occupari deber, quam *objecti*, nempe ipsius *artificiosæ* administrationis, manualium suarum operationum, & ipsi rectè intelligerent, & aliis, quod breviter & nervose præstare facile utique est factu, inculcare meminissent. Sicuti enim nemo *artificiosioris Musicæ, mechanicæ, pictoriæ, sculptoriæ, pyrobolicæ, architectonicæ* &c. rectè peritus atque compos, ita neque ipsi certè hi *Chirurgi*, usquam haberent, quod metuerent, ne ipsorum *ars*, ab *illiberalium* artium aliarum opificibus, vel *imitatione*, vel *æstimatione* justâ, in contemptum adduceretur: ita apud omnes prudentiores tantò minùs illa unquam confundetur, cum illis habitibus, qui magis *simplici* qua-

dam *mandali* peritiâ, quam *rectæ rationis* exquisitiore judiciô, absolvi possunt atque debent.

II.

Et, licet illa *Chirurgorum*, nempe humano corpori per *manuales* operationes bene consulere peritorum, turba, qui *oculorum* vitiis, *herniis*, *calculis*, *manuali* operâ mederi didicerunt, vulgo magis dubiæ existimationis haberi soleat; tamen, cum in aprico positum sit, quod contemptum, non tam *arte* suâ, quàm usitatâ vivendi ratione, circumforaneâ atque histrionicâ, & frivolis ostentationibus, atque pollicitationibus clamosis, sibi accersant: neque ullus hominum ipsam illorum, quousque vera atque solida est, *peritiam*, sed solam hanc *vivendi ataxiam*, in illis aspernetur; non certè habent veri *Chirurgi*, ullam justam causam, cur hoc nomen, (quod græcum, maximi utique æstiment,) etiam germanum in solidum despiciatui haberent.

III.

Interim, ut juxta prudentissimum Galeni monitum, jubens: *In verbis faciles esse, dummodo in re conveniamus*, nemo hominum tam stolidus fuerit, ut illis vernaculam hanc appellationem, utique nimiam latitudine indiscretam, quasi injungere contendat: habet tamen vera ejus vis illud imprimis in recessu, ut veros, huic *artificiose Chirurgiæ*, *limites* definire, & illam exercere professis, eosdem ante mentis oculos sistere, & constanti memoriæ imprimere, exquisitissimè posset, & deberet. Unde quidem justum prorsus atque æquum, & utile omnino, imò credo necessarium, esset, vi dicti respectus, Chirurgum non tam ita simpliciter, uti græcum sonat vocabulum, einen *Handwerker*, oder *Hand-Würcker*, quam einen *Hand-Arzt*, appellare.

IV.

Interim, cum hæc ipsa appellatio, tantum abest, ut
omnem

omnem *equivocationem* tollat, ut potius videri possit, verum *discrimen*, *strictè* & *eminenter* dictæ *Medicinæ*, cum reliqua *Chirurgia* adhuc intricare; dum utique ipsi *Medici* vocabulum, vernaculâ appellatione, aliud nullum sit, quam ein *Arzt*: adeoque neque ipse *Paracelsus*, in hanc ipsam distinctionem intentus, appellationibus illis, *eines Hand-Arhtes* und *Leib-Arhtes*, nudâ vi verborum *equivocationem* omnem exhaurire valeat: præstat proinde, vocibus potius illum usum relinquere, quem ipsa *consuetudine* jam obtinuerunt, quàm prolixius de verbis argutari.

V.

Unde sint certè *Chirurgi*, Græco potius nomine, *manuales operatores*, sine adjecto *Medicæ* seu *medicatricis* operationis, limite: dummodo ipsi *Chirurgi*, rectè informati, contenti esse discant, *manuali* illâ suâ *peritiâ* atque *arte*: & ab illis rebus sibi temperare meminerint, quæ longè aliud quiddam, quàm *directionem* & *applicationem manualement*, involvunt atque complectuntur.

VI.

Quod autem *specialiorem* appellationem concernit, dum *MEDICAM* *Chirurgiam* considerare suscepimus; ignotum esse non potest, quod *Chirurgia* in genere, eundem *applicationem manualement* denotet; Sed *specialius* occupetur, vel circa *instrumenta*, magis immediate solidas corporis partes afficientia; vel circa *remedia*, *humores* potius, aut solidarum partium non tam *texturam* ipsam, quàm *crasim* aut *motum*, *ALTERANTIA*. Quæ *posteriores*, cum tam *materialiter*, quàm *formaliter* ad *Chirurgiam* planè non pertineat; sed *ministerialiter* solū & *instrumentaliter*, ut in scholis loquuntur: bene verò ad *scientiam* & *artem* *MEDICAM*, dictis illis respectibus, pertineat: habet itaque *Chirurgia* simplicior, & *Medica* *Chirurgia*, illam diversitatem, quod prior simpliciter occupata sit, in *applicatione* & *directione* per *manus* exercendâ: posterior verò, in *applicatione* quidem

dem manuali, sed talium rerum, quarum ulterior *effectus*, à *directione manuali* nihil quicquam præsidii aut efficaciarum nanciscatur: sed potius tota *inventio* atque *directio* seu *intentio*, ab aliâ prorsus *arte*, cum *profundiore ratione* effectivâ, peti atque ordinari debeat.

VII.

Quo nempe intuitu, *Medica Chirurgia* definiri poterit, quod, sit *Ars*, per *idonea medicamenta*, manibus tamen aut instrumentis peculiariter *applicanda*, *fluidarum* & *solidarum* partium, inter se *communibus* vitiis, benè consulendi. Et quidem imprimis ejusmodi etiam morbis dicata, qui simul qualemcunque concursum *simplicioris* illius *Chirurgiæ* requirunt atque præstolantur. Sicut enim nemo *Chirurgorum* facilè eo audaciæ procedet, ut v. g. pro *tumoribus œdematosis*, præscribenda *externa* aliqua remedia, ita suæ arti vindicare & asserere velit, ut tantundem *inventionem* quasi atque *præscriptionem* idonearum specierum, quam forte *applicationem* earundem, sub *Epithematum*, *Vaporum*, *Inseffuum Sacculorum*, *Emplastrorum* &c. formâ, sibi arroget: ita profectò nequaquam dispar haberi debet ratio, etiam aliorum remediorum, atque formularum eorundem, quarum quidem *applicatio* manibus peragi debet; *inventio* vero atque *consultatio*, ab alia *scientiâ*, quam *manuali dexteritate* & peritiâ, expectanda venit.

VIII.

Hæc res, si *in genere* solum, debite intelligatur atque æstimetur, nullatenus difficilis erit progressus & applicatio secundum *species*. Et sicut inde, tam *Chirurgiæ*, quicquid illi in hoc negotio competit sine ulteriore controversiâ, liberaliter relinquatur: simul vero etiam *Medica ars*, quod ejus hæc in parte est, intemeratum retinebit: Ita habebit insuper adhuc ipsa sincerior *Chirurgia*, quo *rationalem* suam artem, nempe cum *rectâ ratione* effectivam, ita tueatur, ut dignitatem ejus præ aliis ignobilioribus, & parvò
intel.

intellectu opus habentibus, fartam tectamque conservet. Quâ de re adhuc aliquantò plus verborum facere, propterea tantò magis consultum ducimus, quoniam etiam hoc ipsum negotium, à perplexis quibusdam tricis, juxtâ communem confundendi licentiam, nequaquam satis libera existit.

IX.

Neminem quidem propemodum latere potest, aut certè debet, quod antiquissimis temporibus, imprimis apud *Romanos*, *Medicinæ* atque *Medicorum* nomen, longè familiarius tributum fuerit, *Chirurgicis* artificibus atque operationibus, quàm simplicius *Pharmaceutico-Therapeuticis*. Licet simul, vel antiquissimorum Poëtarum fabulis, satis jam celebris sit, ad chirurgicas sanationes, præter *manuales*, & *manibus* tractandas instrumentales, operationes in usum tracta *pharmaceuticorum* remediorum administratio. Propioribus autem, non tam seculis, quàm propemodum lustris, non solùm *adscripta*, quàm *prescripta* haberi cœpit *Chirurgis necessitas*, nedum *utilitas*, *Anatomica* notitiæ.

X.

Præterea, ab eo jam tempore, quo, cum aliis disciplinis, *Ars* quoque *Medica*, aliquantò curatius æstimari atque ordinari cœpit; maximò quidem jure *Chirurgia*, ita pro *parte* universæ *Medicinæ* censerì occepit, ut quidem *Chirurgi*, æque atque *Pharmacopæi*, pro *ministris*, universa arte potitorum Medicorum, declararentur: hoc ipso verò etiam, in *vero* Medico, si non ipsum *manuale* exercitium, & hujus acquisitus promptus *habitus*, tamen *intellectus* plenus & sufficiens ejusdem, supponeretur, imò ab illo veluti postularetur. Unde, cum sufficiens *Anatomica* corporis notitia, etiam ad reliquam *theoriam* seu *scientiam Medicam*, requiri videretur, tantò magis visa est hæc ipsa occasio satis idonea atque locuples, ut Medicus, pro præ-

cipuis *Chirurgicis* operationibus, earumque *directionibus*, ex *Anatomia* veluti *prærogativam* quandam utilitatis assequeretur, & tantò felicius, intellectu seu *reclâratione* *Chirurgicæ artis*, *regendæ*, potiretur.

XI.

Interim, sicuti universa quoque *Medicæ Anatomice* scientiæ utilitas, admodum prudenter æstimari meretur, ne illi plus, quàm ab eâ expectari potest, tribuatur, seu potius injungatur atque expectetur; valet hoc tantò magis de *utilitate*, nedum *necessitate* ejus, ad ipsam strictius dictam *Chirurgiam*. Sicut enim maximopere interest *Medicæ* theoriæ, ut folerter & prudenter à *physicâ*, de humano corpore, *scientiâ*, discernatur; ita valet, inquam, hæc ipsa *discretio* tantò magis etiam, tam de *necessitate*, quàm ipsa *utilitate anatomie*, ad *Chirurgicos* scopos. Brevissimis quidem absolvitur diversitas *theoriæ*, (tam *physiologicæ*, quàm *pathologicæ*) *physicæ* atque *medicæ*, in eo, quod *physica* harum rerum *Theoria*, nihil quicquam prætermittere possit aut debeat, quod ad *perfectam scientiam causarum & effectuum* facere aut collineare potest: interim etiam tandem in ipsa harum rerum *scientiâ*, *acquiescat*, neque illam ad ultiores *fines* dirigere aut applicare, necessario curæ cordique habeat.

XII.

Medica vero *theoria*, cum in solâ harum rerum *scientiâ* non subsistat; sed specificum suum ulteriorem *scopum* habeat, defectibus corporis humani, tam *præoccupandis* prospicere, quàm jam *obtatis* efficax *auxilium* adhibere: adeoque cum rectâ ratione *effectivam* sese gerere, & *scientiam* suam in *praxin* deducere debeat: manifestum hinc est, quod ad *Medicam* theoriam, è *physicâ*, *universaliori* harum rerum consideratione, nihil amplius pertineat atque faciat, nisi illarum *causarum* atque *efficaciarum* portiones, quæ *PRAGMATICUM* usum ostendant: quæ, inquam,

quam, cum artis *potestate* ita coincident, ut in salutarem *effectum* deduci possint. Ut adeoque *physica* theoria equidem *rectam rationem*, de corporis constitutione, tam integrâ quàm ægrâ, exquisitam involvat: *Medica* vero theoria, cum *rectâ ratione*, *efficaciam* requirat: ad quam nequaquam omnes atque singulæ *scientificæ causæ* conspirant, sed illæ *solum*, quæ verè *pragmatica*, ab ipsâ arte in *effectum* deduci aptam, potentiam, & respectivè potestatem, concernunt.

XIII.

Elucescit res vel uno aut altero exemplo, ad cujus interim tanquam paradigma, multa alia referri possunt. Totius *texturæ solidæ* corporis animalis, plerique omnes affectus, spectant & reduci debent. Si vulnus inflictum sit cuicunque corporis *solidæ* particulæ, *physica* theoriâ verum & indubium erit, I.] Quod ibi certus aliquis *numerus* fibrillarum, è continuitate sua dissolutus. II.] Quod hæc dissolutio in culpa atque in mora sit, ut hæ ita læsæ fibræ, officium suum motorium, quamdiu ita disjunctæ manent, præstare non possint. III.] Quod per hanc ipsam continuitatem dissolutam, *humores* ordinem transitus sui perpetui per talem partem, continuare, imò vel solum illa legitimè contineri, nequaquam possit: IV.] Adeoque, vel per perpetuum *effluxum*, vel si hic circa superficiem cohibeatur, *stagnationem*, *infarctum*, *tumorem*, *inflammationem*, *corruptionem*, partim subeant partim inferant. Pro hujus multiplicis defectus emendatione, sive therapia, mente concipiendâ, necessarium utique erit intelligere, quod, si hæ fibrillæ dissolutæ, pristinam *integritatem* recuperare debeant, ante omnia absolutè necesse sit, ut *singularum* mutuæ extremitates ita inter se, *numericè* (singulæ atque omnes) iterum conveniant, & sibi mutuo admoveantur, ut nulla una, nedum plures, harum, in dissoluto illo statu remaneant. II.] Opus erit, ut exquisitè unius ejusdemque

fibræ, (singularum atque omnium) extremitates, ita iterum coaptentur, ne ulla talium, *alienam* oppositam contingat, adeoque *confusio* fibrillarum, veram efficaciam motoriam, (quam scrupulosiores, non simplicioribus, sed nimium quam compositis necessitatibus *mochlico-mechanicis* superstruunt, (graviter destituat atque lædat. Opus erit III.) ut, postquam *singulæ* fibrillæ, *mutuis* suis extremitatibus iterum ita coordinatæ fuerint, etiam singulæ iterum *connectantur* seu coalescant; quod quidem crasso *conglutinationis* vocabulô, vulgo innuitur, sed nequaquam condigne exprimitur. Hæc omnia, inquam, quamvis *physicâ* consideratione, vera prorsus sint, & certo ita sese habeant, ac habere atque gerere debeant; manifestum tamen est, quod universa hæc consideratio, ad *pragmaticam* Medicam consultationem, nec umbram ullam levissimæ utilitatis contribuat. Postquam utique ab artis *potestate*, alienissimum est, vel *numerum* omnium atque singularum, quotquot ita læsæ sunt, fibrarum perscrutari; vel singularum *extremitates* mutuas, absolutissimè coaptare: vel denique unam, nedum omnes, vero consolidatorio *nexu*, in *integritatem* pristinam aut dubitam restituere. Dum interim, absurdè certè, *physica* speculabunda, disceptat atque altercatur, QUIDNAM illud sit, quod, etiam sine ullo *artis* alicujus adminiculo, omnes has, *arti non concessas*, difficultates, vel promptissimè superat, & spontaneam consolidationem absolvit? *Medica* vero theoria, securissimè in eo acquiescit, QUOD aliquid tale in *vivo* corpore sit, & talia agat atque perficiat, ad quæ ars ipsa, *positivâ* potestate, simpliciter destituatur: interim *privativa*, impedimentorum ablatoria, potestate, ita ubique polleat, ut non solum *primariæ* illi, *intrinsecæ*, activitati, *possit* subvenire; sed etiam subinde ita *debeat* hoc perfectum dare, ut etiam *intrinseca* illa energia, sine tali *artis* subsidio (quod passim in *ulceribus* contingit) neque ipsa potestatem suam absolvere valeat.

Ad quod exemplar, sicuti de magnò numerò etiam aliarum observationum *anatomicarum*, *physicò* quidem certò, *medicò* vero, *pragmaticò*, nullò usu, facillimè fieri potest applicatio; ita de *medicâ*, hujus inquam, *artis usui* respondente, *Anatomiâ*, illud in genere dicere suffecerit; quod *Medico* cuilibet scopo, omninò satisfacere possit, saltem magis *conspiciuæ* texturæ atque structuræ, *situs* ante omnia, tum etiam *connexionum*, præsertim per *communione[m] vasorum*, aliquatenus etiam *nervorum*, NOTITIA. Tanto magis autem *Chirurgiæ* veluti *crassiorum* hujusmodi circumstantiarum *notitia*, equidem sufficere possit. Interim omninò illud maximè adhuc veluti solùm optandum, aut certe eò respiciendum, atque connitendum sit, ut, dum *curiosior* atque *operosior* anatomica exercitatio, pro *physicâ historiâ*, tenuissimam texturarum in corpore, conformationem scrùtari desudat; si non *prius* (quod ad *medico-chirurgicam utilitatem*, ad quam eminenter intenta esse præ se fert, certè pertineret,) tamen ad minimum non nimis *parum*, invigilaret, mostrando tam verò *situi* variorum *ramorum*, tam *venosorum* quàm *arteriosorum*, quin etiam *nerveorum*; prout illi inter *musculosas* partes exterioris, corporis generalitèr, *communi* tractu & divaricatione, repere solent: verum etiam mox ostenderet atque commendaret, illum hujus notitiæ usum, qui partim in instituendis *incisionibus*, partim in æstimandis *vulneribus*, & tractandis aut evitandis gravioribus *hæmorrhagiis*, ex illa percipi potest. Quorsum etiam omni modo referri debet, incitia quasi solennis & veluti nulla animadversione seu emendatione digna haberi apparens, de *situ* imprimis *socio*, vel *crassissimorum*, & summæ superficiei proximorum, *musculorum*; & diversæ horum *crassitiei*, tum propriæ, tum comparativæ, mutuæ; nedum communio- nis illius, ubi muscoli sibi mutuo *incumbentes*, *communius*

(nam utique non absolute exquisitum hoc universaliter esse, nemo negabit) *vasa* sua sanguifera, à propinqua aliqua divaricatione, eousque communis rami, accipiunt. Quod certè, ad *medico-chirurgicos*, tam *pathologico-prognosticos*, quàm *præcticos* usus, immensum quantum gravius est, ignorare, quàm si Medicus & Chirurgus, nesciat, an *Diaphragma* sit *músculus duplicatus*, an ad malleolum tympani in *aure*, peculiaris *músculus* exilissimus pertineat, aut an musculorum plerorumque *structura*, exhibeat fibrarum series sibi mutuo incumbentes, plus minus *rhomboideas* &c. Ita nempe non solum illud antiquissimum habendum veniret, ut, dum *unum est faciendum*, *alterum non* censeatur *omittendum*: sed etiam iusta atque prudens æstimatio instituatur, & clasfis veluti duplex instruatur, eorum, quæ magis *necessarium*, aut fortè *utile* sit, scire, quàm alia quædam: sed etiam, quænam de utraque classe, *non* possint, aut omninò *possint*, vel sine notabili, vel sine ullò, detrimentò *ignorari*. Juxta quam certe methodum si instrueretur, *Systema* quodlibet *Anatomicum*, nimio majoris pretii futurum esset, quam confusa illa intuitu methodorum, scripta adhuc diem quælibet, sunt aut esse possunt.

XV.

Ut hujus rei aliquod solum exemplum allegemus, memorabimus sequentem casum: „Inflitum erat Viro vulnus, quatuor ad minimum pollices longum, obliquo tractu per exteriorem cubitum, abscissa simul particula plus dimidium pollicis lata de extremitate olecrani, fessui pollicem profundum. Ad hoc vulnus inspiciendum atque æstimandum quanti periculi, quantæ difficultatis ad percurandum, & an etiam cubitus atque manus, aliquod, aut nullum periculum amittendi motus aut sensus, inde expectandum haberet, mittebatur, quartò die ab inflitò vulnere, Medicus & juratus Chirurgus. Intumuerat non solum latè brachium, & labia vulneris, sed abscedebat jam

„jam, seu succedebat suppuratio, sive uti vulgò loquun-
 „tur maturatio. Chirurgus qui curam vulneris gerebat,
 „meritò monebat, ut modeste, quam importune flagita-
 „bat alter Chirurgus, visitatio, ut hi appellant, vulneris,
 „institueretur: abstergebat itaque vulnus, ut, quantum ocu-
 „li valent, rectè inspici posset. Impatiens autem, ad su-
 „spectam usque importunitatem, deputatus Chirurgus,
 „non solum *visitationem* sibi deposcebat, sed etiam *stylis*
 „potius quàm *specillò*, ita immodestè vulnus laceſſebat, ut
 „sub anxiis, & propemodum lipothymicis, ægri ejulatibus,
 „Chirurgus curæ præfectus, de tali tractatione protestando
 „interpellaret. Protestabantur vicissim, ad inspectionem
 „hanc deputati, quod hâc ratione, ob denegatum suffi-
 „ciens scrutinium, justam relationem formare impediren-
 „tur. Memorabant itaque scriptò, (quod imprimis Medi-
 „cus concinnaverat,) satis bonâ fide, situm atque magni-
 „tudinem vulneris cum conspicuâ tum temporis, sympto-
 „matum conditione. Ubi vero ad formandum judicium
 „sermo devolvebatur, protestabantur: Daß, wegen verweis-
 „gerter genauerer visitation und perſerutation der Wunde,
 „ſie nicht gründlich erfahren können, was etwa vor vasa oder
 „nervi durch die Wunde lædiret ſeyn möchten: interim hoc
 „non obſtante, diſertis verbis judicabant: daß die Wunde
 „keine würckliche Gefahr, auch keine Sorge unumgänglicher Er-
 „ſolgung der Lähmung auf ſich hätte: Die Heilung aber wohl
 „bey die 6. Wochen, adjectâ expreſſione, ſonderlich wegen des
 „darzuſchlagenden Glied-Waſſers, erfordern würde. Curaba-
 „tur interim, imò ſanabatur, vulnus, intra 4. ſeptimana-
 „rum ſpatium, licet ſine *Synoviâ*, (Glied-Waſſer) quam il-
 „li pro ſuâ experienciâ & arte, etiam ſine conditione,
 „tanquam certò expectandam, ſuppoſuerant: non autem
 „univerſæ ſuæ libertati reſtitui-potuerat motus digitorum
 „præſertim, extenſorius; ob complexum muſcularem, cir-

„câ exteriorē apophyſin ulnæ ejus brachii, vulnere illō
 „graviter læſum. Interim, ſicuti fando vix perceptum eſt,
 „quod Medicus prudens, aut Chirurgus peritus, in vulne-
 „re, jam tumore, & maturatione, ut vocant, affectō, ma-
 „nuali, & instrumentis armatâ, viſitatione, ſcrutari, & ad
 „conſpectum veſtigare, debeat aut poſſit, ſive vaſa, ſive
 „nervos, in eâ parte fortè læſos: ita anatomicæ potius no-
 „titiaſe debebat, præcognitum habere quænam vaſa,
 „aut qui nervi, in vulnere ita conſtitutō, lædi potuerint,
 „aut, ex ſymptomatibus evidentibus, læſi eſſe, colligi atque
 „judicari debuerint. Cum enim inſignis utique, funi-
 „culus quaſi, ſeu plexus nerveus, ad partes infrâ cu-
 „bitum pertinens, juxta ipſum olecranon ordinariè excur-
 „rat, & tamen totius manus omnis motus, non exquisitè
 „ſublatus inveniretur, non utique formandum demum e-
 „rat judicium, per *autopſiam, inſtrumendali ſcrutiniō* eru-
 „tam, an hic nervus totus diſſectus ſit; ſed colligi pote-
 „rat, negativa hujus dubii, ex ipſâ tali rationali conſequen-
 „tiâ, nempe non penitus ablatō motu, & imprimis ſenſu,
 „earum partium, ad quas nervus ille diſtribuitur., Quod
 „nempe exemplum illi ſcopo præſertim inſerviet, ut liqui-
 „dò appareat, quomodo fruſtrâ ſubinde, *exquſitum* ſubtile
 „ſcrutinium *anatomicum*, neceſſarium fingatur, & defectui
 „ejus, intelligendi atque dijudicandi impedimentum im-
 „putetur, dum interim craſſioris quaſi nempè evidentioris,
 „partium, talium conſtitutionis, meritō ſupponenda, ſed
 „deficiens atque neglecta notitia, abunde ſatisfacere poſſet,
 „toti negotio, quatenus reverà *pragmaticum* eſt.

XVI.

Sine ullâ verò injuriâ, hûc etiam referre licet, illam
 ſolicitudinem, quam, licet ex ipſâ etiam ſaltem *craſſiore*
 anatomicâ notitiâ, cautiores aliqui recentiores Anatomici,
 fovēt, circa *inciſionem* partium muſculofarum; præ-
 cipientes, ut illa potius fiat ſecundum *longitudinem* fibra-
 rum,

rum, quàm per *transversum* earundem. Formidantes, ne posteriore hâc ratione, facilius aliquid *convulsi* superveniat, quàm priore modò. Sed, quemadmodum Chirur- gi, communi consensu, ab experientiâ familiari, artificia- li, hanc formidinem etiam plus deridere audent, quàm reverà meretur; quandoquidem, ubi reliqua opportuni- tas hoc admittit, monitum hoc nequaquàm ita absolute negligi aut contemni debet: ita ad minimùm eximiè sub- levare hanc formidinem potest notoria illa experientia, quod utique innumera, per violentiam inflicta vulnera, tractum hunc fibrarum nequaquàm sequentia, tamen for- midatam illam consequentiam, *convulsivorum* eventuum nequaquàm inferant: & certè, grande hoc esset infortu- nium, si ita, uti hâc speculatione metuitur, hoc facerent. Ut taceamus, quod etiam illa *incisio*, absolute secundum longitudinem fibrarum, quoad ejus exquisitissimè fieri pos- set, perpetrata, tantò certius necessariam faceret perpe- tuam *dilatationem* per *Turundas*; dum sine his, longè cer- tius ita connivet, ut neque *evacuationi*, neque *mundifica- tioni*, satis liberum pateat spatium: dum interim peritio- res Chirurghi longè magis timent molestas sensationes à *turundis* expectandas, quàm quodlibet tanquam certiùs expectandum symptoma, à transversali vulnere; nempe per *essentiam*, & non per *accidentales* exasperationes.

XVII.

Sed redimus in viam. Ubi nempe, licet Chirurgis, sufficiens scientia atque sanus usus anatomicæ constitutio- nis partium, minimè rejiculam utilitatem promittat; imò *necessaria* potius sit, pro variis operationibus rectè regen- dis; nequaquàm tamen ejusdem ordinis etiam est, *Phar- macia*, quatenus *solidarum* partium læsionibus quadrat & debetur. Cum enim hæc, eminenter, non tam ipsas *so- lidas* partes in *texturâ* suâ, *situ*, aut *connexione*, respiciat; sed vel *sensum* atque *tonum* harum; vel *humorum crasin*

C

atque

atque motum, intrâ, atque circâ, partes solidas læsas: & harum rerum, non tam instrumentaliter *mechanicas*, quàm *chymico-physicas*, *Alterationes*: manifestum hinc est, quod non tam *Chirurgicæ*, *mechanico-organicæ*, quàm *Medicæ*, *physico-pharmaceuticæ* æstimationis, hoc sit negotium.

XVIII.

Adeò, ut hæc res non ad *Chirurgiam*, vel paulò strictius *limitatam*, sed simplicius ad *Medicam*, quatenus *Chirurgiæ contrâ distinguitur*, *physico-pharmaceuticam*, *scientiam & artem*, *rationem & experientiam*, referenda veniat.

XIX.

Meretur interim *Medica Chirurgia*, propterea dici, quia utique illis pathematibus, utilis imò subinde necessaria est, quæ simul *Chirurgicam manualementem* opem expectant. Dum enim v. g. in *Vulnere*, aut *Ulcere*, fuinde necessaria, semper vero utilis est, manualis *chirurgia*, pro *extergendo*, *decenter deligando*, & iterum iterumque hac cura *observando*, *vulnere* aut *ulcere*; tamen *stagnatio humorum*, subnascens inde *Tumor*, *Inflammatiō*, *Suppuratio*, *Dolor*, *Affluxus* immoderatio, *Corruptio* citior atque intimior, non certè ejusmodi sunt effectus, qui *manuali*, aut *instrumentali mechanica* opera, curari possint: sed *pharmaceutico-physicam* requirant medelam, quæ singulis atque omnibus his conditionibus debitum moderamen atque levamen adhibere possit.

XX.

Ubi utique à *Chirurgia*, intra suos *limites* coërcita, nemo hoc exegerit, ut illa sciat & intelligat, quænam *pharmaceutica remedia*, *humores* ad faciliorem, *suppurationem* disponant; quæ nimiam *stagnationem*, & importuniorum *affluxum*, potenter dissipent: quæ *inflammationem*, nimiam discutiant, moderatam vero, utpote necessariam atque salutarem, tolerant: nimiam, & penitiorum *corruptionem*,
hòc:

hòc ipsò præoccupent: nimiam *sensationem*, quæ etiam magnam partem ab his ipsis dictis circumstantiis dependet, *mitigent*, atque avertant: Quin ipsam nervosarum partium nimiam *irritationem* demulceant: imò (quæ propria est verè *balsamicorum* remediorum destinatio) ipsam *energiam* naturalem, ad *alacriter* æquè, atque *tranquillè* & *ordinatè*, refarciendum & structuram instaurandum, excitent. Cum hæc omnia, potius à *ratione*, *physico-pharmaceuticâ*, è firmâ & constante *experientiâ*, derivanda, cum nullâ *manuali*, aut crassius *mæchanicâ* instrumentali, efficacîâ, conspirent.

XXI.

Quæ res, cum ita sua luce radiet, ut prolixiore anxîâ deductione, nullatenùs indigeat; proximum est, ut illud solùm planius reddatur, unde *ortum* suum traxerit, inconsiderata illa atque temeraria confusio, qua proletarii *Chirurgi*, hanc etiam *Medicinæ* partem, ad operationes ipsis certius convenientes, etiam audacius trahere, & sibi quasi vindicare in animum induxerint. Neque vero ullâ opus hic est peculiari sagacitate aut solertiâ, ad pervidendum, quod *duplex* conspicuum sit hujus rei fundamentum. I.) *Empiria* generalior, seu *confidentia experientiæ*, citra ullam *rationem*, seu exactius *judicium*. II.) *Conniventia*, passim certe in socordiam usque prolapsa, *Medicorum*. Dum enim prioris intuitu, *Chirurgi* æque atque *Medici*, generaliore *experientiâ* compertum habent, quod certa quædam *composita* pharmaceutica, in casibus *simplicioribus*, ita satis *universaliter*, etiam simplicioribus scopis satisfaciant, ut illis, tanquàm experimento cuidam securo atque certo, inniti atque acquiescere, integrum videatur; factum hinc est, ut *Chirurgi*, tanquam per manus tradita *nuda* hac *Empiria*, vix operæ pretium ducant, *Medicum*, tanquam altioribus curis, sive distractum, sive destinatum, de consilio aut auxilio interpellare. Cui certe eidem fun-

damento, non solum *conniventia*, & tandem penitus *scordia*, Medicorum inædificata est: sed mox etiam ea Chirurgorum arrogantia atque licentia, ut hæc universa nequidem competere Medico, sed ipsis proprie convenire, imò deberi interpretarentur. Unde, quæ est imprudentiæ, cum impudentia, non magis literalis consonantia, quam moralis conspiratio, jam omnibus constrinis, quasi privilegiatum invenias axioma usitatum: Um diese Dinge hätte sich der Medicus nichts zu bestimmen, das müßten sie wissen, davon hätten sie so viel 1000. (si vel sæpe duo, aut certe unum o [nul] deficiat) Erfahrung, darinnen solte der Medicus nur sie sorgen lassen, und er um innerliche Verwahrung, (& ut hodie *πρωτεύουσιν*) Benennung der Schärffe, bemühet seyn &c. de qua re, priusquam amplius dicamus, dicendum adhuc aliquid venit, breviter & ut speramus perspicuè, de *ratione medicâ*.

XXII.

Dum fontem atque fundum hujus confusionis, assignamus *nudæ Empiriæ*, breviter dicendum est, de *RATIONE medicâ*, quæ *nudæ empiriæ* limites ponit. *Theoria Medica*, utique non est *praxis*; non inquam, *experientiam* nudam, sed *rationes* pervestigat: verum, *cujus* rei? certè *Experientiæ* seu *experimenti*. Sicut omnis *scientia*, præsertim in *ordine cognoscendi*, versari debet circa *subjectum*, de quò, & *cujus rationes*, pervestigat & enucleat: nempe, ut in scholis loquuntur, (dum *scientia* dicitur, *cognitio rerum*, secundum causas suas) *causarum ordinem* in illâ re, pervestigat: ita certe nihil aliud quàm *experientia*, seu *experimentum practicum*, est illud *subjectum*, *cujus rationes*, (*respectus causales*) enucleare, est (*objectivè*, & tandem *syst-matico subjectivè*,) *Theoria medica*, ita certè fit, ut talis *theoria*, nempe *rationalis conceptus*, de tali *effectu experimental*, non sit ipsum illud *experimentum*: sed certè tanquàm *subjectum*, præsupponat atque habeat, ipsum *experimentum*.

Interim, uti *nuda* atque simplex *Empiria*, ita simpliciter in *uno* experimento seigniter acquiescit, ut plures ejus & *multiplices circumstantias*, nequaquam ad animum revocet; sed totum negotium, hoc intuitu communissime variè *compositum*, pro una simplici re, interpretetur: ita certè vera illa *rationalis* theoria, neque ipsa aliunde veriore suum ortum trahere potest, quam ex ipsa *experientia*, sed non solum *multiplici* (non *numero*, sed ipsa *specie*) *judicio*sè comparata. Ita, ut *Ratio medica*, nihil aliud sit, quam *speculativa*, sed *vera* atque *firma*, rei veritati consona, *connexio* & *conclusio*, è *comparatione* plurium *experientiarum* (repeto, non solum *numero*, sed etiam *specie*, diversarum (experimentalium practicarum & *pragmaticarum*, veritatum. Quæ explicatio, si exquisitè intelligatur, paucis certe comprehendi poterit; quod sæpe prolixis ambagibus, magis impeditum, quam expeditum redditur. Quod *Theoria medica*, omninò sit *cognitio*, (non simpliciter *experimentalis memoria*, sed) *rationalis verarum* causarum; sed *cujus rei* causarum? *Experientiæ*, seu *expertarum veritatum*. Dum ex adverso, si *theoria* aliqua, nudis *speculationibus* superstruitur, neque de *experimentalì veritate*, nec *experimentalì veritati* respondens, vana necessario est, & tantò magis simpliciter imaginaria, quantò minus *experimentalì veritati* quadret, aut illam exhaurit. Ubi nempe totum fundamentum, si qui hic committuntur, errorum, situm est in *inscitiâ ordinis causarum*, è fastidiò, & fastuosò contemptu, puerilium studiorum, in ipsis trivialibus scholis, ubi hæ simplicitates discendæ fuerant, neglectorum. De qua re tragicè pronunciant Præceptores, quod *philosophia contemptum sui vindicet per totam vitam*, und was Sånßgen nicht lernet, lerne Sånß nimmermehr.

dam culpam *confusionis* vulgaris, & temerariæ *arrogantiæ*, non tam Chirurgorum (qui peritiores, fatis frequenter etiam prudentiores se gerunt) quàm fastuosorum Tonforum, assignavimus, quanta hîc sit, ne Respondenti invidiam conciliem, ego Præses, quamvis etiam sine ullius hominis injuria hoc dictum velim, provoco ad communem experientiam, non dicam singulorum conscientiam; quotusquisque quæso, è tantô Practicorum vulgarium numerô, cordi habet, nedum in numerato habet, scire, *Quid* sit, (nedum quare tale sit) Ungventum, ut vulgò vocant, *digestivum*, ad vulnera; *defensivum*, sive *emplasticum* male cohærens, sive *cataplasticum*: sive *epitheticum*: aut parium diversarum formularum, vel *Maturativum*, vel *Mundificativum*, vel in genere *traumaticum*, vulnere magis immediate adhiberi, uti solitum, ita creditum adhibendum: *Sarcoticum* & *Epuloticum*, sive *intempestive* & *præpostere*, sive *tempestive*, applicari, sive solitum, sive debitum? Quotusquisque, inquam, ita harum rerum, & conscius atque intelligens, & curiosus est, ut discretionem illam cordi habeat, *quomodo*, & *quousque*, remedia hæc, *specie*, *tempore*, & *subordinatione*, quasi jurata quadam credulitate, sine judicio ad quemlibet casum in individuo, Chirurgis necessaria visa, *revera* talia existant? nedum, an non omnibus his scopis, (quamvis pro diversitate loci affecti,) & paucioribus & melioribus, speciebus atque formulis, satisfacere esset integrum? Nempè *Ratione*; omnibus modis hic magis consulenda; quàm juratis illis simpliciter *empiricis* formulis & subordinationibus, non solum *insistendo* atque *inbærendo*: sed etiam sine exquisitô *judiciô* effectus, inconditam hanc methodum *prosequendo*.

XXV.

Ubi certè alia calamitas, nimium quam frequenter, deinde premit Medicum practicum; quando vel *inconsulto* Medico, ipso Medico vel imperitiori Chirurgo eousque
totam

totam curam concedente, sine judicio *ratione*, nuda *empiria* perperam adhibita talia experimenta, vulnus in deteriore statum adduxerunt; ut ex *inequali* mundificatione, partialis *hypersarcosis*, aut è vulnere *ulcus*, & in hoc (imprimis per temeraria *septica*, aut neglectam *mundificationem aequalem* (*Sinus*; aut *Fistula*: aut per Mercurialia acria septica, latiores *Inflammationes*, aut *spasmi* periculosi: aut (quam justissime, imperitiæ, aut neglectui Chirurgorum, *Paracelsus* imputat,) *Synovia*: aut *Aridura* &c. supervenerit, tunc demum Chirurgus, à Medico consilium postulet; & ille, quod antea depravatum & corruptum est, in se non suscipere erubescat; aut, dum suscipit, ipse minus harum rerum peritus, calumniam reportet, non solum ab ægrò, sed maxime ab ipsò Chirurgò, audacter tunc utique causante, Er hätte, so viel an ihm, gethan, aber die Zufälle wären so schwer, daß müste nun der Medicus verstehen. Ubi, si Medicum ex illo latere, huic usitatæ pathologiæ, arripere potest, dieses käme von denen scharffen scorbutischen Säfften, und verderbten Geblütthe her, welches durch innerliche Arzneyen corrigiret werden müste: egregie hic consonante *Paracelso*, & misera illa *Chymico-mechanica pathologia*, humorum *salinorum*, *ponticorum*, *aluminosorum*, & plane *scissorum* feu *fissilis aluminis* genii, imò *relollaceorum* &c. tunc certe si male exit totum negotium, in quem alium tunc recidit, tota male cedentis negotii calumnia, quam in ipsum Medicum.

XXVI.

Ut itaque *Medica chirurgia* suo juri atque ordini afferatur, asseveramus, quod siue *inventio remedium*, *exteriorius* quidem applicandorum, sed *craseos humorum*, (intra solidas partes stagnantium, aut jam ibidem *discrasiam* atque *corruptelam* aliquam perpefforum,) *alterationi* quadrantium; aut jam inventarum talium *formularum*, *justa ordinatio*, non Chirurgi quæ talis, sed Medici judicio atque

que discretioni, propriè debeatur & *incumbat*. Cum enim, ad justum, & rectè conveniens, tale medicamentum imperandum, tam vera *species affectus*, quàm justum *tempus*, & subinde necessaria debita *subordinatio*, sit τὸ *ἑσπερίον*; cujus *æstimatio*, atque judicioſa *destinatio*, non simpliciter *peritiâ* chirurgica, sed *scientiâ* medica determinari debeat; elucescit hinc facile, utrum *Medico*, an *Chirurgo*, tum tempeſtiva *præscriptio*, tum justa *ordinatio*, harum rerum, adjudicanda, imò *demandanda*, veniat. Cum luce meridiana clarius sit, quod Chirurgi hæc negotia, vix non absolutè semper, non secundum *æstimationem* aliquam, atque prudentem *discretionem*, sed tanquam ad juratam *formulam*, sine circumſtantiarum *dijudicatione*, administrent atque exſequantur. Quod nempe verum est fundamentum, ex probationis illius, quam vulgus ita paſſim Chirurgis objicit, ut quasi in proverbium abierit, die Barbiers halten die Schaden nur auf, machen sich viel daran zu thun, ja machen sie schlimmer, damit sie nur lang daran zu handthieren, und die Patienten ums Geld zu bringen haben. Ubi tamen frequentissime, cordatissimus quisque Medicus, vel juramentum credulitatis, salva conscientia, interponere posset, quod eventus tales dum reverà obtingunt, non tam à *malâ fide* Chirurgi, (quam vulgus hominum hac imputatione arguere videtur,) introducantur: sed simpliciter, ex *inscitiâ*, tam verarum circumſtantiarum, quibus talia remedia propriè deberentur: quàm ex *ignorantiâ*, quem directum effectum remedia talia exſerere possint aut debeant: interim ex illa quasi possessione, dum nihilominus Chirurgi harum rerum usum, ita sui arbitrii faciunt, ut earum administrationem propriè ad se pertinere persuasi sint, & à suis Magistris in hunc sensum ita instituantur ac edoceantur, ut etiam pro reliqua sua, quasi per institutionem combibita, arrogante audacia, non dubitent Medicos ab harum rerum recte administrandarum consultatione, planè excludendos

censere: si qui verò, quos non plane deesse satis comper-
tum habemus, longo usu, aut informatione idoneorum
Medicorum, præcipuè verò simul judiciofa solertia has res
melius *æstimare*, *intelligere*, atque *ordinate*, secundum re-
pertas circumstantias, *administrare* didicerunt; adeò, ut
illorum discretæ executioni securius fidere, & patientes
tales concredere, sit integrum: illos utique non simplici-
ter ut *Chirurgos*, sed ut *Medico-chirurgos* considerandos esse,
in aprico est.

XXVII.

Ita enim, quando peritorum talium Medico-chirur-
gorum laudabilia documenta atque scripta expenduntur;
Fabricii ab Aquapendente, *Fabricii Hildani*, *Sculieti*, & ex
parte *Felicitis Würtzii*, & similium: ante oculos utique est,
quàm longè illi abfuerint, à *nudè Empiricis* illis, quasi jura-
tis, paucorum officinalium, simpliciter quasi *statis* applica-
tionibus: sed potius ipsi, certas *remediorum* formulas, de-
nuò *præscripserint*; & horum etiam verum usum, non *em-
piricum*, sed *rationalem*, nempe certis circumstantiis & con-
ditionibus affectuum, animo destinaverint.

XXVIII.

Ut res vel unò aut alterò exemplò illustretur, quis,
nisi talium rerum planè hospes, nescit, quod triviales Chi-
rurgi, frequentissimè ita dicto illo suo *Unguento digestivo*,
è *vitello ovorum*, *melle*, atque *Terebinthinâ*; in recentibus
paulo *profundioribus*, & *dissimilares* aliquas partes afficien-
tibus, vulneribus, diuturniore *continuatione*, nihil certius
efficiant, quàm ut majorem *ardorem* in vulnere, majorem
inflammationem per ambitum, copiosiore *affluxum* (etiam
per ipsum sensum *doloris*) & tandem majorem *acrimoniam*,
& loco puris laudabilis, *Ichorum* ferosorum proventum, &
tandem vulneris in *ulcus* refractarium, conversionem in-
vitent: adeoque non solum opprobrium illud inde repor-
tent, daß sie den Schaden nur aufhalten, sed planè, non sine

fundamentò, arguantur, daß sie den Schaden schlimmer machen: nempè, licet vel maximè, quod facile largiar, sine mala fide; minimè tamen sine inscitia atque imprudentia veriore. Quæ res etiam tantò evidentior est, in partium *exsanguium* concurrente læsione, *Tendinum*, *Ligamentorum*, & hoc nomine *Articulationum*: qualibus cum *Mel* non quadret, sed concepta *fermentativâ* acrimonia, sensum acerbius exagitet, in promptu inde est exortus illè *fluxus Synoviae*; & tandem *arrosio ulcerosa* talium partium, & nimio difficilior inde restauratio consolidatoria. Ut reverà, quamvis rem è suis fundamentis verisimiliter ipse quoque non satis judicare potuerit, interim in genere nequaquam vanus sit *Paracelsus*, dum *Synoviae* provocationem & exasperationem, non tam necessitati ipsorum vulnerum, quàm *imperitiæ*, potius *inscitiae* atque *imprudentiae*, *Chirurgi* imputare non dubitat. Adeò, ut in hac solennissima, & planè triviali ac veluti jurata remedii formula, multum tamen intersit judicare, ubi majus aut minus, additi *mellis* (ut in simplicioribus carneis vulneribus) minus autem *Terebinthinae*, sit momentum, aut contrà. Dum vulgares *Chirurgi*, tantum abest ut intelligant, ut etiam nequidem credant, in tali re necessariam esse aliquam discretionem, sed speculabundis opinionibus nodum in scirpo quæri, interpretentur.

XXIX.

Ita, quid magis in ore & manibus est *Chirurgorum* vulgo, quam decantatum illud *Unguentum*, jam *fuscum*, jam *purpureum*, *Felcis Würtzii*? adeò, ut quando reliqua sua usitata artificia nihil proficere animadvertunt, ad hæc tanquam sacram anchoram non solum confugiant, sed ita illis insistant, ut totum felicem curæ exitum ab his expectare non dubitent, nempè prorsus ignari, quod remedia illa, magis ad *abstersionem* solum, seu moderatam *sepsin* destinata, nihil nisi *mundificationem*, non tam *humorum* ulce-

roso-

rosorum, quam superficiei *solidae* partis, inservire debeant, daß sie einen frischen Grund bekommen; *Continuatione* verò immoderatiore, non solum carnosarum *fibrarum*, & tantò magis *tendinosarum*, acriorem *irritationem*, sed etiam, imprimis *posteriorum*, *arrosionem* profundiorē exsequantur, cum omnium symptomatum nova exasperatione, novorum, *spasticorum* etiam, provocatione, *fungosarum* excrescentiarum superventu, imò ubi *ossa* denudata sunt, horum *denigratione*, & tandem planè *carie*. Quod idem valet, de variis aliis ejusmodi formulis, præsertim recentioris inventionis; ut, sine intellectu, quibus *specialibus* conditionibus eadem à suis authoribus destinatae sint, nihil nisi absolutum experimentum generalis & universalis utilitatis in iisdem supponentes, non solum frustra iisdem utantur, sed etiam subindè damnum, incondito talium usu, introducant.

XXX.

Quorsum etiam, summo jure, referenda venit, non solum solennis, sed etiam publica quasi auctoritate, non tam confirmata, quàm jam tùm obfirmata, illa licentia, ut *Emplastra coquere*, adeò proprii *sui juris* esse interpretentur, ut etiam in magistralibus illis suorum Candidatorum docimasiis, tanquàm præcipuum specimen examinis sui, in hac coquinaria collocent. Dum interim, indolis specierum, ad gradum coctionis subindè valdè diversimodè se habentium, planè rudes, ad nihil aliud, totò suò arbitriò atque decretò approbationis, respiciunt & recontendunt, quàm ad verè chirurgicam, *manuariam*, Emplastri conditionem, nempè *consistentiam* ad *extendendum* super alutam, commodè tractabilem: sine ullò intellectu, an Crama tale vel habeat, vel intemeratas, sub illa coctione, *conservet*, *vi-res*, ad eum cui destinatur, effectum: neque ad animum revocantes, sed sæpè vel planè in ostentationem convertentes, quando per domesticam suam Emplastrorum talium

coctionem, *teneriores* atque *penetrantiores* *Gummi resina-*
rum portiones, ita in auras dissipantur, daß es die Nachba-
ren in ihren Häusern fühlen, wann der Barbier Pflaster kocht,
oder Cataplasmata siedet.

XXXI.

Unde profectò, cum harum rerum justus intellectus,
a Medico non solum minimè abesse debeat, sed illi potius
propriè competat, imò incumbat; certè etiam hac in par-
te, tam *Chirurgis* trivialibus non ita libera concedi deberet
harum rerum licentia: quàm in ipsis *pharmacopoliis* inspe-
ctionem aliquam exerceri conveniret, ne tales præparatio-
nes imperite, aut potius minus scitè, peragerentur.

XXXII.

Quid verò, quod jam pridem etiam solertiores Practi-
ci, aurem imprimis vellicante *Zwelffero*, fatis olfecerint,
quàm inconcinnæ sæpenuerò sint formulæ illæ variè con-
farcinatæ usualium Emplastrorum diversorum. Cujus rei
duo illa exempla speciminis loco esse possunt, Emplastrum
Diachylon simplex, & de *Ranis Vigonis cum Mercurio*. Dum
enim prioris utilitas, in *mucilaginum* tenacitate quàm plu-
rimum fundatur, ut *ogglutinis* quasi poris, cohibitâ tran-
spiratione, *emollitio* subtus nascatur: ibi, dum hoc empla-
strum sive domi apud *Chirurgos*, sive in *pharmacopoliis*, in
majore quantitate coquitur, & coctum in repositoriis af-
fervatur, intra aliquod temporis spatium ita *desiccatur*, ut
plane amplius *tractabile* esse recuset, & scopum suum ne-
quaquàm amplius attingat. Adeò, ut ad minimum quan-
do aliqua ejus portio in usum vocari debet, non magis expe-
diret, quàm necessarium planè esset, portionem aliquam
præsentiori usui per modestam *recoctionem* adaptare: dum
secus, frustra deindè speratus effectus ab ipso expectatur.

XXXIII.

Emplastrum verò de *ranis Vigonis* cum Mercurio, di-
ctum, magnâ fiduciâ inter *Chirurgos* celebre; licet non
solum

solum ratione *denominationis*, ab illis aliquot *ranis*, abso-
num, sed certè totà reliquâ compositione, inane: quis ex-
pectabit, ut à quolibet Chirurgo in effectum deducatur, sive
secundum crudam illam descriptionem antiquiorem, (ab-
surdam illam *extinctionem* Mercurii *per salivam jejuni* ho-
minis, imperantem, & à *Zwelffero* non immeritò derivam) sed
etiam secundum hujus ipsius *Zwelfferi*, incassum operosio-
rem, procedendi methodum, & ad suppositam efficaciam
profectò inutilem, *solutionem Argenti vivi in aqua forti* aut
spiritu Nitri. Dum nempe, sicuti tota *Zwelfferia-*
na animadversio & instructio, reverà simpliciter *pharma-*
co-poëtica est; nempe solum, in ordine ad conciliandam ju-
stam emplasticam *consistentiam*, & evitanda sub commixtio-
ne incommoda, directà: ita tamen certè vix ab ullò Chi-
rurgò, nisi aliàs *chymicarum* operationum mediocriter pe-
ritò, etiam hujus diversi apparatus dextra administratio
expectari meretur. Ut taceamus, quando jam etiam dex-
terrimè perfectum est, quod, præ longè *concinnioribus* a-
liis applicandi *formulis*, præcipua illa *destinatione* effectus
Mercurialis, nucem cassam valere non possit. Et similes
certè, tam *preparationum* tricæ, quàm *usuum* defectus, ul-
terius etiam facile notari possunt, non solum in varietate
illâ numerosâ multorum emplastrorum, sed etiam in con-
cinnitate præscriptionum, intuitu, ut vocant ingredien-
tium.

XXXIV.

Sicut autem præparandi dexteritas pro similibus com-
positionibus, certè meliore jure de *pharmacopæis* exercita-
tis, præsumitur: ita æstimatio *efficaciæ* præscriptarum spe-
cierum, à quò aliò, ullò jure, expectari debet, quàm à
Medicis; cui nempe vera, imò *verax*, energia simplicium
specierum, cognita esse supponitur. Adcò, ut non solum
in *seligendis*, & ad præsentem casum *prescribendis*, his & si-
milibus remediis; sed etiam in expendenda, & melius in-

Ardua, *concinnitate* formularum, tum ad *consistentiam* justam obtinendam, tum ad destinatum *effectum* obtinendum, non solum *proprie*, sed certè *unicè*, à Medico expectari debeat præsidium.

XXXV.

Confidimus, aut certè bonò jure speramus, nemini grave futurum, si *fontem* omnium talium abusuum, & alienorum ausuum, collocemus in Medicorum, passim observandorum, neglectu, *Chirurgicarum rerum in genere*: nempe, non solum ad *dexteritatem manualemente* & *mechanico-instrumentalem*, sed etiam ad *efficaciam alterativam, pharmaceutico-therapeuticam*, tam rectè *discernendam*, quàm *solenter intelligendam* minus curioso animo; & in, fastuosè passim jactata, *empirica* utrarumque harum rerum, tam peritià quàm experientia *Chirurgorum*, acquiescente. Ubi, cum evidentissimum passim inveniatur, quomodo Chirurgi, è nudò & communiter crasso, *non cause ut cause*, conceptu, experientiam illam de *efficacia* talium medicamentorum, sibi atque Medicis nimium credulis, persuadeant: ita uni huic fundamento utique *superstructa* est tota illa *confidentia* communium Chirurgorum, orali traditione propagata; primò quidem aliquantò modestior, zu diesem Schaden, thut dieses oder jenes Pflaster, Ungvent, &c. sonderlich gut: mox autem importunior, & ad disceptationem usque, cum Medico dubio, aut minus vel attento, vel ipso rectè perito, procedens, dieses oder jenes Pflaster, Ungvent, &c. mußhier gebraucht werden: & si Medicum vel paululum hæsitantem anmadvertant, da lasse nur der Herr Doctor mich machen, das müssen wir wissen, davor habe er keine Sorge, sondern seye nur um innerliche Verordnung vor den Patienten bekümmert. Et paratissimi sunt Jovem lapidem jurare, si, ex inconveniente, aut insufficiente, tractatione, grandiori aut graviore *vulnere*, & *inflammationi* prævalescenti, *Febris vulneraria* accadat, nullam usquam *chirurgiæ* suæ, sed solius

folius *Medicinæ*, sive non tempestive *occupantis*, sive non rectè *efficacis*, agnoscendam esse culpam. Cum tamen, importunæ *Hæmorrhagarum* cohibitioni, durch allerley Blut-Stillungen und stopff-Pulver; succedens mox gravior atque grandior *inflammatio*, & tam ab hac, quam in ipsis vulneris labiis, exquisitior & perrennior *dolor*, *agrypnia*, *spastica* sensationes &c. non solum veri *auctores*, sed & insuper firmi *fomites*, *februm* talium, communissime existant: neque, nisi his rebus rectè & sufficienter, per *externa* remedia, consultum sit, per *interna* ullum sufficiens operæ pretium, vel soleat fieri, vel omnino possit.

XXXVI.

Quæ verò alia, quam simpliciter nudæ *Empiriæ* superstructa, est illa Chirurgorum familiaris audacia, in *decernendis* atque *cøquendis*, *portionibus vulnerariis*? Quâ in re, sicuti profecto in ipsis Medicis practicis dogmatibus, maximoperè optanda esset, veritati consona peritior, instructio atque institutio; ita certe nulli alteri rei, quàm huic defectui, assignanda venit, quasi necessitas illa, harum rerum minus curiosis Practicis incumbens, ut confidenti illi Chirurgorum asseverationi, de sua circa talium artificiorum efficaciam experientia, totum negotium concedere necesse habeat Medicus.

XXXVII.

Quam difficultatem, licet ab aliquot annis sublevare visa sit experientia compositæ illius aquæ vulnerariæ, quam imprimis Gallici Chirurghi, nomine *L'eau d'arquebuse* decantare cœperunt; tamen qualemcunque ejus, sub dextra præparatione non contemnendum, effectum, iterum passim irritum reddit, & ad solam vanam expectationem repellit, conamen illud multorum Chirurgorum, Aquam hanc domi suæ, suis manibus præparandi. Cum enim totus cardo obtinendæ verius *efficacis* hujusmodi compositæ aquæ, vertatur, in *fermentatione* debi-

ta specierum, *ante* destillationem; cui effectui nimio plus quadrant, *recentes* adhuc, *succulentæ*; quàm *desiccatae*, nedum in pharmacopoliis consenescentes & *effætæ*, tales herbæ: fit certè ex harum rerum inscitia, ut hic etiam ausus, deinde bonam illam, imo prodigam, & negligenter securam, spem destituat, & fiduciam in hoc remedium repositam, aliis utilibus, imo necessariis subsidiis, interim neglectis, ad incitas redigat.

XXXIIX.

Cui rei, præterea, accedit, imprudens illa opinio, (quamvis dubitem an solis Chirurgis, certo tamen his, familiaris,) quasi aqua hujusmodi composita, præcipuam suam efficaciam quam maximè habeat in consistentia, seu *portione* hujus destillati liquoris, *spirituosa*, *ardente*; quæ interim ipsa consistentia, cum potius *adversetur*, non solum generaliore, sed potius universaliore, efficacia, specialibus illis scopis, quibus destinatur, *vulnerariis*, adversa; fit inde, ut minus peritè parata hæc aqua, scopo quoque suo nihil satisfaciat. Sicut enim equidem de totâ hac scientiâ, nemo quicquam exegerit à Chirurgo, quâ tali; ita tamen, saltem hac occasione, moneri ad minimum meretur, quod utique error hic versari videatur, in male intellecta valde *diversa* indole, *spirituosarum* aquarum, per simplicem *abstractionem ardentium* spirituum, aut *vini spirituiosi*: & contrà, per adornatam & præmissam justam *fermentationem*, parandarum. Ubi, cum priorum efficacia, utique ita innexa sit *ardenti* spirituosæ consistentiæ, ut ab illa facile separari non valeat; cum *aquosa* vero succedente portione, minimum ejus amplius subsequatur: ibi admodum diverso certe modo se habet res, cum aquis ejusmodi, quæ cum dextrè adornata *fermentatione prægressa*, præparantur; utpotè in quibus, non tam solum *Sulphureo-volatilis*, sed per justam *fermentationem*, cum tennerrima *salina* substantia subagitata, adeoque etiam *aquositate*

tati adhuc *sociabilis*, *crasis*, obtinetur. Quod vel solius herbæ *Veronica*, recte ita fermentando præparatæ, aqua, posterior, de spiritu primò prodeunte vix quicquam amplius participans, *sapidissima* tamen atque affatim *odorata*, manifestum reddere potest. Quod per occasionem dixisse suffecerit.

XXXIX.

Sicut autem, tam in *vulneribus compositis*, nempe, juxtà cum *carnosis*, etiam *tendinosas* aut *ligamentosas*, aut *glandulosas*, partes complexis; quàm in *ulceribus*, præsertim per sinistra artificia ad *degenerem* indolem devolutis: æquè, atque *symptomatibus*, per sinistros ausus, ex obliquo introductis: serò tandem, peritioris alicujus Medici consilium flagitare, paulo adhuc moderatiores Chirurghi, non utique obliviscuntur: Ita, aprico interim positum est, quod prægressa illa fiducia male fundata sui ipsius, non solum frequentissimè in certa culpa sit, quamobrem deteriores tales conditiones atque constitutiones, talibus læsionibus supervenerint: sed etiam immenso intervallo inter se distent, *facultas*, nedum *facilitas*, deteriores tales successus, statim à principiò instituta, aut conquisita, bene fundatâ, tractandi methodo, evitandi, aut *præoccupandi*: & serò deinde, graviter jam perverfas res, *corrigendi*, & in *ordinem*, nedum in *integrum*, restituendi.

XL.

Cum enim hujusmodi læsionum salutaris cura, non *instrumentis manuariis*, sed *remediis pharmaceuticis*, quàm maximè inniti debeat; quorum verior *efficacia*, & *utendi* modus, à Chirurgò nequidem ab ullò prudente exigitur: postulare certe totius rei indoles & ægrorum necessitas, ut *Chirurgis* severè interdiceretur, à suscipiendis talium affectuum curis, sine *Medici* tempestivo plane consilio, in præsidium potius, quam subsidium adscito.

Valet hoc tantò magis, in affectibus ita rariùs eventibus, ut facile fieri possit, ut casu in terminis, Chirurgus, quamvis aliàs in praxi suâ constituto, vix per totam vitam suam offerantur. Cujus rei exemplum afferre placeat, quod qualiscunque tandem momenti sit, prudentibus arbitris relinquimus. „Apice crassioris cultri, quò dapes profecari consueverunt, einem Trenchier-Messer, fortius vibrati, inflictum est vulnus per transversum unguis pollicis, si longitudo ejus unguis in partes quatuor distinguatur circiter in ultimâ hujus divisionis notâ, versus articulum pollicis; Foemina tenerior, dum medullam ossis, quod sinistra manu tenebat, acutiore cuspide cultelli scrutatur, incautâ aberratione, cuspide in pollicem irrumpente, fecat ungvem, per longitudinem, latere ejus indicem respiciente: prius autem illud vulnus per transversum inflictum, facile æquabat profunditate, mediocris stipulæ stramineæ latitudinem. Sensus statim succedebat utrinque, admodum acutus, in Viro non solum ad cubitum, sed propemodum ad humerum excurrentes, sicuti Foemina quamvis etiam terroris partibus concurrentibus, lipothymiam incurrit. Fateor curiositatem sciendi, quid medicationis hic suafurus esset, peritior quilibet Chirurgus; quid ominaturus de symptomatibus, satis probabiliter si non expectandis, certe metuendis: quid judicaturus de decursu & successu, usque ad plenam restitutionem, & de tempore ad hanc (licet unguis non sperando coalitu, seposito) præfiniendo. Missis tamen his, feram saltem conditiones. 1.) Quò remediò, sic affectam, ita sensibilissimam, partem (subtextam ungui) instruere vellet, atque imbuere, ut *dolor* vix decima sexta horæ parte, momentaneis decrementis, ita conquiescat, ut, sine rudiori attactu, planè nullus sentiatur. 2.) Nulla *alteratio*, sive *saniosa*, sive *ichorosa*, aut ullius generis *abscessio*, sequatur. 3.) De-

3.) Decrescentibus indies, etiam exquisitioris sensus ab at-
 tactu reliquiis, quicquid, præter ipsum durum unguem,
 vulneratum erat, sex circiter dierum spatio, *in integrum*,
 restituatur, & sanetur. 4.) Non nisi *unô eodemque* reme-
 diô, simpliciter *continuato*: 5.) Quod, præterquam quod,
euporista en sit, & vix fieri possit ut non ubilibet inveniri,
 valeat: 6.) Præterea vix *tres nummos*, dico sex obolos, de-
 poscat, cum passim etiam fieri possit, ut gratis obtineatur.
 Puto me satis certum esse posse, quod plerique, & vix er-
 ravero, si dicam omnes, Chirurghi, problema hoc vel joco,
 superstrui, vel cavillationi, vel notitiæ arcani cujusdam,
 specifici, arbitraturi sint; interim assevero Ego Præses, qui,
 has curationes, & certe in corporibus ubi quam maximè,
 meâ intererat, peregi, vulnera hæc, exquisitissimè secun-
 dū conditiones has, sanata sciam, sine ullô incommodô. To-
 tum autem remedium, sine ulla aliâ manuali dexteritate,
 seu chirurgiâ, nihil aliud fuit, quàm ut pollex, absterfo,
 ad ficcitatem cruore, & vulnere dimidia guttula olei Tere-
 binthinæ imbuto, intingeretur ad plenariam cooperturam,
 vulneris, ceræ flavæ molliter liquatæ; & ita servaretur o-
 pertura hæc per tot dies: admissa, per priores dies, dum,
 cera non nihil dehiscit à digitô, guttula dicti olei, semel,
 aut bis per diem: firmato interim operculo, per deliga-
 tionem, nihil ulterius artificiosam, quam ne decidere pos-
 set. Ita certè, quicquid etiam imperitiores de his exem-
 plis sentire possint, tamen peritiores, quod de chirurgis,
 quibusdam dicere possum, vel ad solam auditam vulnera-
 tionis talis historiam, non fastuosè, sed fastidiosè affici,
 potuerint, & non solum varias difficultates curationis, sed,
 varia pericula, certissimè verò eximias etiam molestias, &
 incommodissimos progressus, quasi præfagire.,

XLII.

Ut adhuc unum exemplum, etiam in simpliciùs chir-
 urgicis, sed tamen *rationis physico-medicæ* cynoluram.,

requirētibꝫ, affectibꝫ, adducamus, recenseo sequen-
tem casum. Vulneratus erat, homo quidam in pede cir-
cà talum, alius in brachio circà carpum; hic ferro, ille
grandine plumbea. Utrique læsa erat arteria, & imprimis
in priore etiam ad conspectum usque in propatulo appa-
rens, ubi nempe dilucescebat, quod vulnerata solum sit,
non discissa penitus. Gerebant ægrorum curam Chirur-
guli, mox bini, procedebant reliqua non ita æque in de-
terius, sed insuperabile symptoma erat incoercibilis Hæ-
morrhagia, grandia illa incommoda objiciens, quod (inu-
tilibus insuper) adstringentibus medicamentis, diuturna,
ut in tali casu solent, deligatione sine solutione interposita,
& ligatura insuper forti compressoria, reliquæ constitu-
tioni vulneris non modo rectè non consuli posset, sed a-
ctu illa inde etiam in deterius conjiceretur. Quod tandem
æstimantes, tam ipsi, quam ulterius in consultationem ac-
cincti plures Chirurghi, auxilium petierunt ab adustione
arteriæ per candens ferrum, unde momentanea restrictio-
ne secuta, mox tamen sanguis iterum erupit, & per fasci-
as defluxit. Ille qui in manu læsus fuerat, per vices pro-
rumpentibus hæmorrhagiis exhaustus, obdormivit.

XLIII.

Qui pedis vulnus tolerabat, cum multorum jam die-
rum periodis, machinas illas perrumpentibus hæmorrha-
giis, similiter totus deficiens, foras spectaret, quasi aliud a-
gendo, tentabundus, casum mihi Præsidi proponit Chirur-
gorum unus, quem ita instruxi. Non est Chirurgorum,
vulnera arteriarum, cum insigni adjacentium partium con-
vulnatione conjuncta, simpliciter in se recipere. Ratio,
quia quæstio hic est, vel de *Therapia arteriæ consolidatoria*;
vel de alio consilio, illi arteriæ *therapiæ* succeturiando. The-
rapia *consolidatoria*, non est in potestate artis pharmaceuti-
cæ, nedum chirurgicæ, sed solius naturæ; in arteriæ autem
læsione *simplicissima*, unice juvari potest, *forti diuturna*
com-

compressione: quæ cum in *conjunctio vulnere* locum non inveniat, *medicamenta* vero, per vim *erumpentis* sanguinis, inania hîc sint, quæcunque vulgo nota atque usitata sunt, (uno solo, hodiè innotescere incipiente, non quidem excipiendo simpliciter, sed tamen nec absolutè, ut omnia reliqua, ab omni bonâ spe excludendo,) nihil ita restat, nisi ut aliûs auxilii consilium quærat. Hujus tamdiu impotes sunt, quicumque vulneris *arteriæ*, vel *consolidationem*, (sub hisce circumstantiis) adhuc sperant; vel *hæmorrhagian* è vulnere *arteriæ*, non *consolidando*, sine præjudicio reliqui communis *vulneris*, machinantur compescere: unde ab altiore *ratione* petendum est consilium. Quod interim, si non *maturè* fit, & in effectum deducitur; posteaquam jam æger hæmorrhagiis totus confectus est, & reliquum vulnus, pro altero scopo, inutilibus machinamentis, tam mechanicis quam pharmaceuticis, in pessimum statum devolutum est: deficit etiam *pragmatica* consilii efficacia & utilitas. *Arteria* itaque grandiuscula, (nam in *teneras*, physicè vix cadit) *vulnerata*, una cum reliquo vulnere, quod compressionem arteriæ firmiorem, usque ad spontaneam ejus consolidationem (plurium dierum opus) non permittat (& si unicum illud refugium, probabilissimè non satisfaciat,) absoluta necessitate penitus *discindenda* est, cum decente ligatura.

XLIV.

Antè omnia verò, *pessimo consilio* ulla grandiora vasa, absolutissime verò *arteriæ*, *inuruntur*. Cum enim *ustio*, portionem tunicæ vasis corrumpat; hæc vero non solum in *membranaceis* textis in genere, sed tanto magis in *canalibus*, humores motu impulsos continentibus, vix, imò dicere audeo nunquàm, nedum citò, renascendo expleatur & resarciatur, (ut de necessariis *abstersionibus labiorum* nihil ultra cogitemus,) manifestum hinc est, quod *ustio* hîc penitus *irreparabile* inferat damnum; si ullum aliud alicujus spei adhuc compareret crepusculum. Imò, cum consultò *disse-*

æ prorsus arteriæ, extremitas, coalescere nunquam possit, quamdiu ab *ustione* quicquam adhuc alterationis retinet; facit pessimum hoc consilium, etiam illud unicum auxilium, vel prorsus irritum, vel nimio difficilius. Quod hic etiam factum esse auguror, nam de eventu, imò nequidem in effectum deducto hoc consilio dissectionis, non sum certior factus. Interim ita moriuntur ægri, ut sine consilio, aliunde certè quam ab instrumentali & manuali peritiâ aut promptitudine, præsertim respectu absolutæ ejus necessitatis, petendo; ita sine auxilio idoneo, præsertim unico, inter multa licet alia, irrita, quia aliena.

XLV.

Quid verò aliud, quam per totam propemodum Europam, notissimus hodie est abusus, temerariæ confusionis *Medicæ Therapeutice* praxeos, cum administratione sincerius *chirurgica*, ausus ille, quorumlibet propemodum Tonforum, quò *Salivationem*, tanquam simpliciter *Empiricâ* methodo, imò potius *Amethodia*, sine discrimine personarum æque atque realium circumstantiarum, exercere nunquam dubitant. Non solum planè ignari, sed & hoc salvâ reliqua sua Chirurgica peritiâ, (utpote ad quam hæc res plane neutiquam pertinet, neque propterea etiam ab ullo prudente homine ab ipsis expectatur, nedum exigitur,) ignari, inquam, quibus *conditionibus* & veluti *gradibus morbi* verè *veneri*, *Salivatio* conveniat atque quadret? ignari, quibus *pharmaceuticis*, *therapeutice præparationibus*, corpus ad liberum & æqualem ejus *successum* prædisponendum veniat: ignari, quo *rationali ordine*, atque *processu*, placido & *successivo*, *commotio salivatoria* instruenda veniat: ignari, quâ *necessariâ methodo pharmaceuticâ*, & *consilio* atque *regimine therapeutico*, *successus* ejus foveri, atque placidè promoveri debeat: ignari, *quantum & quousque*, secundum *subjectorum diversitatem*, illa vel *impelli*, vel *continuari* debeat: Ignari, quomodo illa ad *exitum* atque *cessationem*, vel

per-

perduci, vel *permitti* debeat &c. non solum *præposterè*, sed omninò etiam *importunè*, quin temerariè, totum hoc negotium *suscipiendo*, præcipiti impulsu *exagitando*, & sine præfidiis atque subsidiis justis, *prosequendo*, certissimè longè gravioribus, quàm natura rei ferebat, *incommodis* sæpissimè vero etiam *periculis*, imò *funestis* eventibus, aut ad minimum *irreparabilibus* *damnis*, ægros subjiciunt.

XLVI.

Unde serò deinde in *Medicum*, onus illud rejiciunt, ut ille res graviter *turbatas*, aut *pessumdatas*, in integrum restituendas, in se suscipiat; quando alibi, ab *interne* exhibitis Mercurialibus neque ipsis rectè *præparatis*, aut ad tales usus temerè applicandis, *anxietates præcordiorum*, *tormina atrocitæ*, *inflammatoria*, *convulsiva*, *vomitibus* *efferi*, *Diarrhææ* &c. nulla apparente *Salivatione*, cooriuntur; repentinò *infartu*, non solum *Gingivæ*, sed ipsæ *faucium angustia*, impetu repentinò *inferciuntur*, *inflantur*, *inflammantur*, *finduntur*, *ulcerantur*, ut inter levisissima *damna* sint, *dentium denigrationes* & *casus*: quando ægri in *strangulatoriæ* suffocationis periculum inciderunt, *collum*, imò totum *caput*, intumescit, *visus* & *auditus* *damna* eveniunt, aut *paralytodes* *impotentia* in aliquod membrum incidunt, aut *tremores perpetui* remanent: ægri, per longum temporis spatium, *enervati*, *pallidi*, *atrophico-hectici*, remanent. In *fæminis*, neque habita est ratio, *instantium*, aut *superventurorum Mensium*, neque *moderamen* aliquod ad hanc circumstantiam directum. Nullum justum & conveniens *regimen*, neque *præscriptum*, neque sub quotidianâ conversatione examinatum, & ab illis exactum, circa *moderamen caloris* & *frigoris*, & *aëris liberi* &c.

XLVII.

Quæ omnia, cum notoriè sic se habeant, monstri simile est, neque ipsos tales artifices *peravociv* seu cogitatione de harum rerum causis & cautelis tangi; sed potius qualitercunque felicioribus tandem eventibus, neglectò *incom-*

modisimò decursu successu (in *robustioribus* & *patientioribus* subjectis,) mordicùs inhærentes, sinistrorum successuum & eventuum suam aliquam hic culpam, præfractè negare: sed etiam à Therapeutarum *Medicorum* chorò, non solum in genere minus coërceri, & malorum talium effectuum recente remonstratione, in viam cogi: sed vel plane *consentientibus* cum ipsis, non solum *intempestivâ*, sed etiam in se communissime *falsâ* illâ excusatione obfirmari, quod molestiores & pejores tales eventus ab individui *cacochymia*, præsertim stolidâ illâ, *scorbutica*, per accidens, (nempe respectu infantis *salivationis*, tam perversè institutæ) ortum suum traxerint. Cum, si nihil aliud, illud certè totum hunc syncrètismum perpetuo premat, quod proinde antea rectè judicari debuisset *præsentia* talis *cacochymia*; quâ deprehensâ, aut non dum satis *præreptâ* atque *remotâ*, nequaquam audere convenisset, hujusmodi medicatione ægrum talem aggredi, eumque ita in hæc pericula atque damna conjicere. Ut ita certè etiam in hoc negotio, rectissimè *Medico-therapeutica* subordinationi, chirurgia, nempe applicatio atque iusta observatio *salivationis* administrandæ, serio & severe subjici deberet.

XLVIII.

Nequè verò etiam illa Chirurgorum *αλλοτρεσίας* practica, leviorè censuram meretur, quando non solum in genere, *causticis* atque *septicis*, verus sit *locus*, *usus*, imò iisdem *opus*: sed etiam, ubi vel *utilia* vel solum *tolerabilia*, sint *mercurialia septica*? utpote quæ in *venereis* affectibus veris, longè innocentiora, (sub prudente solum usu) aliis casibus vix usquam propemodum *tolerabilia*, & *periculo*, quin eventui, damni obnoxia, demonstrat circumspecta experientia.

XLIX.

Solent hic, imprimis verò circa *Salivationem* decernendam & exercendam, tam Chirurgorum audaciores, quam
alii

alii paris in hoc genere proterviæ, (qualibus certè non modo sciet, sed planè squalet hodierna sub praxeos medicæ prætextu, grassandi licentia,) ad omnem temeritatem prompti, salutaria monita eò prætextu aspernari, quod *temeritas* in his rebus, non aliunde ipsis obijciatur, nisi à *timiditate*, in similibus negotiis rariùs, aut scrupulosius versatorum; cum, licet utique multi ipsorum ad propriam experientiam tam locupletem temerè provocare non valeant, tamen è communi, & velut *universaliore*, protestentur, quod sub tam familiari, & quantum vel ipsi non diffitentur, passim *incondito* atque audaci, *salivationis* exercitio, tamen immensum quantum minor observerur numerus, ubi *ingentia pericula*, aut tanta censura digna, *damna*, observentur. *Interdum populus rectum videt, est ubi peccat.* In genere quidem, non contemnenda est hæc animadversio; & recordamur, D. D. Præsidem hâc ipsâ, tanquam *argumento* non rejiculo, usum esse, adversus nimium liberales, & præsertim in hypothese pessimi exempli, declamationes, adversus *generales*, tanquam justissime suspectas, imò planè accusandas, & à post facto, graviorum quorundam eventuum, tanquam pro directis causis allegandas, *malignas* energias argenti vivi, sub quocunque tandem præparationis schemate, & quocunque etiam modo, illud adhibeatur. Contra quales insimulationes, nervum habet certè firmisimum, *argumentum*, petatum à *ravioribus*, imò si rectè res æstimetur, *rariissimis* talibus, vel solum in *analogica proportionem*, similibus, eventibus, etiam à mercurialium medicationum inconditò prorsus abusu. Sed hoc non ferit illum scopum, ad quem nostri causarii collineant; quandoquidem in hoc suo cœpto, *duobus* modis graviter aberrant, imò *tribus* potiùs. I.) enim illud proprius ad quæstionem pertinet, si vel maxime *rariùs* valde finistri eventus obtingerent, annon tamen illi à male institutò *salivationis* usu pendeant? jam verò valet, sanò sensu, illud Senecæ, *Quod cuiquam potest accidere, potest etiam cuivis*: nempe, non de *universalitate* effectus seu *actus*, sed tamen *eventus* seu potentia, validâ assertione. II.) Adhuc propius ad quæstionem illud pertinet, an, ubi utique ad totam negotii summam

& exitum, non tantum redundat damnum: tamen ad *decursum* totius negotii, *symptomata* inquam, sub *progressu* Salivationis; non rarò, sed certè longè sæpissime, hoc pertineat, ut ægris hæc medicatio non solum nimio *molestior* eveniat, sed etiam gra-
tuitis multis acerbioribus symptomatibus stipetur, ab incondi-
ta illa *administrandi* ratione, quod nequaquam eveniret, si rectè
potius omnia agerentur. Id quod sæpenumerò, non solum in
hòc incommodò subsistit, sed etiam, & plus negotii chirurgus
facescit, & majoribus sumtibus, (præter *erosiones faucium, uvu-
lae, palati, casum*, aut ad minimum *corruptelam, dentium &c.*)
ægrum onerat. III.) Quod quidem prudente æstimatione est
dignissimum, etiam ipsa hæc observatio, tanquam in genere fal-
lit, si vel maximè illà non intendant fallere, ipsos allegantes; dum
raritas illa gravissimorum affectuum, plurimum debet *diversitati*
subjectorum; dum nempe magnus ille numerus, in quibus etiam
licentiùs exercita Salivatio, tam eminentes & gravissimos malos
effectus non producit, complectitur *plebejos* homines, *robustio-
ris* indolis atque assuetudinis, de *militum gregariorum, nauta-
rum, opificum*, turbâ: cum quibus paria facere *teneriores, deli-
catiores*, in otiosiore vitæ genere, & lautâ diætâ constitutos, non ni-
si imperitissimus jusserit, aut hoc ab his expectaverit. Unde, cum
tales *posteriores* imprimis, *Medicorum* consilia & auxilia, & possint
& soleant in subsidium advocare; meritò certè cautela adhibenda
est, ne tam imprudenter, quàm planè impudenter & malitiosè, res
suas, è tali ægrorū *valde diversâ* constitutione pejus cedentes, ad-
eòq; indiscreti usus vitio, ita evenientes, audaculi tales laborent in
ipsius *Medici concursum* rejicere: dergleichen seye ihnen sonst nicht be-
gegnet, wo sie ihre Sachen alleine machen können, stehe dahin, wie die
dabey gebrauchte Arzneyen damit einstimmen, und sich zur Sache schi-
cken. Quod quidem non absolutâ injuriâ practicis Medicis ob-
tingit, quando illi simul in consilium adhibiti, omnia alia potius
agunt, quam ut directè curæ habeant, Chirurgi ausibus mode-
randis atque rectè ordinandis invigilare: siquidem illud reverà
verum est, quod, quicquid extrà, aut ultrà hunc scopum, simul
cum reliqua, imprimis *inconditâ, salivationis* administratione,
age-

agere suscipiunt, illud reverà propius esse possit, turbando ulterius, quam aliunde sublevando aut juvando, toti morbo.

L.

Essent plura certè *Casuum* chirurgicorum exempla, quæ omninò digna essent planiore, ex his fundamentis demonstratione; sed cum intuitu propositi nostri, de *Medicæ chirurgiæ in genere* consideratione, jam his etiam exemplis abundè egisse videri possimus, cuivis potius prudenti arbitro, illud non magis relinquimus, quàm omninò commendamus. Illud adhuc consideratione solertiore dignum judicantes, quod ad exceptionem *timiditatis* attinet. Institutum certè est, propter evidentem *necessitatem* magis, quam solum *utilitatem*, omnibus modis optabile, imprimis pro eximio usu *militarium* corporum atque coetuum, ut *Chirurgica* hinc inde *schola* aliqua, eminentiorum hujus mundi Potestatum gloriosa munificentia, erigeretur; cum autem ad laudatissimum hujusmodi institutum, prima propemodum ratio habenda veniat *subjectorum*, tali studio idoneorum: proxima verò, *institutionis*, ad indolem atque scopum *subjectorum* talium, probe proportionatæ: Asseveramus itaque, quod ad *discendam* Chirurgiam, *strictè* dictam, inquam, *timida*, *anxia*, *dubia*, *tarda*, *speculabunda*, indoles, prorsus sit inepta. Et licet *temeritas*, & *præsentia animi*, atque *promptitudo*, tantundem, quantum *temeraria confidentia*, & *justa sui fiducia*, nempe multis parasangis, inter se distent: tamen, si hic aliquid, (ut sunt res humanæ, à mediocritate ad stateram, alieniores,) concedendum hic sit, præstat utique, ad *mediocrem* inclinationem in audaciam, respicere, quam *timiditatem* aut *tarditatem* eligere, aut illi favere. Protestamur autem solenniter, ne quod de *strictè* dicta Chirurgia, nempe *artificiosa manuali*, & *mechanico-instrumentali* exercitio, intellectum volumus, ad confusam illam *therapeutico-chirurgicam* audaciam, extendatur.

LI.

Ut hujus rei explanationi lucem aliquam affundamus, judicamus auro contra carum esse, in hoc scriptorum genere, *Marci Aurelii Severini* opus, de *efficaci Medicinâ*; in comparatione ad

Fabriciorum, & plerorumque aliorum, labores. Certe enim, quando *Severini* commentarios legas, nisi timidissimus fueris, fiduciam inde aliquam assequaris, ad minimum ad decernendum, (modo semper sit ad manus, quæ dextrè adsequatur, manus,) *Ure, Seca*; & , iusta æstimatione, præ alacritate, risum ille subinde, prudentem tamen, movere possit lectori, quando sine ambagibus, & quod Galli loquuntur, sans façon, *secare* jubet, *refecare*, & *abscindere*, *extirpare*, aut *ferro candente urere*: Totus profectò *strictè* dictæ Chirurgiæ *Chiron* verus, atque *stator*. Ad cuius ductum si *Chirurgica* schola instruatur, non poterit felici *dogmate* destitui, usque ad *habitum exercitatione* ipsa manuali acquirendū.

LII.

Dum, exadverso, reliqui, (nec ipso *Sculteto*, ad *strictam* chirurgiam de cœtero, fano sensu, etiam magis adhuc laudabili Doctore, excepto,) dum velut de professo, *Medicam*, *manuali* chirurgiæ, sine discrimine sociant, Chirurgis quæ talibus offendiculo profectò sunt; adeoque scripta illorum, prout jacent: *Medicinæ* studioso, & *præceos Candidato* & *cultori*, summopere commendanda, è Chirurgorum, quæ talium, manibus, potius excutienda veniunt. Siquidem hos, præsumtuosæ illi omnia complectendi vanitati jam sponte paratos, præter intentionem Autorum, ad nudam atque indiscretam, talium rerum *Empiriam*, ita invitant, ut postea autoritate talium Præceptorum, adversus omnia meliora monita, veluti cataphracti obsistant. Quæ res an aliquo, & quanto, fundamento nitatur, omnium peritorum Practicorum iudicio commendamus.

LIII.

Sicut autem ex huiusmodi doctis laboribus, & quicunque ad horum ductum ulteriùs instituuntur, *scientia*, *strictè* dicto Chirurgo necessaria, utique conquiri potest; *qualibus* affectibus, *quomodo* constitutis, *quæ opera* chirurgica, debeatur, & *quò tempore* atque *ordine*, illa exercenda veniat: Ita tamen longè paucissimorum utique ingeniorum illud est negotium, non solum è *dictis* atque *scriptis*, sed, licet maximè *commendandis*, omni de reliquo linguâ potioribus, *præfigurationibus* illis & *pieturis*, præter modo

do dicta, ad ipsam *manu* aut *instrumento* operandi, *dexteritatem*, aliquid, subsumere aut colligere, quod *pragmaticæ* executioni satisfaciat. Utpote quod sine controversiâ, tantum *ocularis*, è præmonstratione, *inspectionis*, manu propria *imitationis*, *tentaminis*, & tandem *habitualis* dexteritatis, est negotium. In quo proinde, æquisimo certè animo, & penitus scientes atque volentes, *Chirurgis peritis* hîc cedent Medici; quamvis *scientificè*, & per *theoriam* & *mentalem præfigurationem*, harum rerum affatim intelligentes. Et erit hîc omninò labor, in *schola Chirurgica* instituentda, Chirurgis non tantum liberaliter *relinquendus*, sed *assignandus*, imò autoritate Medicorum *muniendus*, pro *exercitatis* Chirurgiæ *Magistris*, ut has res *doceant* discipulos suos, nedum ipsi illas, cum laude & assensu Medicorum, exerceant.

LIV.

Ubi profectò locum habet, in tempore & loco, si aliàs minus in promptu esset, *excusatio* illa, quin, in casu, *admonitio* talium Chirurgorum, ne Medicus, minus ab experientia æque atque ratione instructus, omnia ad *fibras* atque *lineas* metiendo, ridiculos dextris talibus practicis scrupulos injiciat, aut ipse solus sentiat. Sicuti profectò talium rerum inconsiderantia, non rarò, vel tacito, derisui Chirurgorum exponit Medicos. Cujus rei statim, etiam ex supra jam allegatis, exemplum exhibere possem Præses; ubi Medicus, per rationes alii potius suæ indoli quàm medicæ functioni, innixas, de grandi atque periculoso vulnere, superciliosius judicare, cum illud minimè vidisset, sibi indulgens, occasionem præbuit Chirurgo curam ejus rei gerenti, ut ægrum, jam ad eum statum restitutum, ut tutò in liberum aërem prodire posset, ad Medicum adduceret, rogans, ut ex præsentī adhuc vulneris constitutione, de primis ejus, jam præteritis, conditionibus, prudentem æstimationem comparativam, instituere, in se fuscipiat; ubi Medicus religati vulneris talem constitutionem aspiciens, non modo exterritus sese avertendo, sed planè in proximum conclave abeundo, & deligare solum iterum jubendo, chirurgum, (& cujusvis arbitrio relinquendo quo jure) suspicari fecit, præsertim gestibus conspirantibus,

der Herr Doctor müſte etwas weichherzig ſeyn, und vielleicht dieſer Art Wunden nicht viel geſehen haben, und hätte beſſer gethan, er hätte nicht vorher ſo verächtlich davon geredet, und ſie ſo geringe, pro ſua autoritate, declariret. Unde aureum illud, *Suumcuique*, uti ſemper, certè etiam hic habet locum.

LV.

Exquiſita verò proſectò prudentia, & nuſquam Chirurgis, ſed Medicis, verum & *ſcientia* & *peritia*, & ex his junctis *prudentia*, pollentibus, commendandum illud eſt negotium; cui, ſed nuſquam ſufficienter *limitato*, ſuperſtructa eſt tota illa confuſio, in qua extricanda laboravit hucusque noſtra Diſſertatio, ut, quia minimè ad hunc diem perfectum eſt, in illud conſilia conferant, quousque Chirurgis etiam, *inſnuari* poſſit, & ita demum deinde *concredi*, in neceſſitatis caſibus, *Medica Chirurgia*, ſeu *therapia Chirurgica*. Id quod commodiſſime, ſed brevibus longa dicendo, duobus modis fieri poſſe, judicamus. I.) Ut ipſis talia medicamenta *externa*, *deſiniantur*, quibus, ſine aliquo damno, & *heteroclitici* effectus aut eventus, juſto metu, uti poſſint. Sed II.) hoc ſolum tantisper, donec quantocyus Medici conſilium in ſubſidium vocaverint, & autorem illum naſti ſint, quid ultra agendum: ne ſibi ſumant, totum negotium ſoli, non ſolum proſequi, ſed prorſus exequi.

LVI.

Odioſa, quamvis infauſto fidere, ſed utinam otioſa ſit, eſt illa Chirurgorum, prout jacent res, exceptio, nam non poſſum ſincè dicere cavillatio, *Quid ſi in Medico parum ſit præſidii?* Unde, cum rectiſſimè, & aureo monito dicat, *Chryſoſtomus* ille *moralis*, *Seneca*: *Cum vitiis dico convitium, cum primis meis dico*; proſectò ex nullò aliò, quam medullitùs ſincè affectu, hoc moneo atque obteſtor, Præſes, ut, dum de *Medicæ Chirurgiæ* ſeriâ diſcretionem, à ſimplici *manuali* & *mechanica*, aliquid conſtituendum eſt, *Medici Medicam Chirurgiam* ita cordi habeant, *ut ſit in illis*, quod proſectò eſt in arte, *præſidium*: ne, dum deinde de corpore delicti oritur altercatio, apud prudentiores facile ſit judicium, ubi delituerit error; & an reverà, (quod cer-

certè locum habet, si *serò* consulatur Medicus,) Chirurghi præsumtuosæ negligentiae tribuenda veniat culpa: an verò Medicus, quocunque tandem tempore advocatus, nulla alia probatione, quam sola voce, chirurgus exprobrare possit, er sey nicht recht mit dem Schaden umgegangen: & sicubi testatum reddere jubeatur, nihil aliud allegare possit, quam ad summum experientiam, er habe wol ehe einen solchen Schaden gesehen, der glücklich von einem mehr erfahrenen Chirurgo curiret worden sey. Quæ res cum sit *facti*, in *processu* parum habet momenti; siquidem exceptio circumstantiarum diversarum, ut in promptu est, ita, nisi alia adferantur documenta, præsumptionem largitur Chirurgus, contra Medicum.

LVII.

Unde, ut tandem ad finem perveniamus, commendamus meritò omnibus, Medicinæ seriam operam navare paratis, ut cum reliquæ *pharmaceutico-therapeutica*, eminentius dictæ, *Medicinæ* studio, conjungant *utriusque Chirurgiæ*, studium. Necessariò quidem, *Medicæ* chirurgiæ, seu *pharmaceuticæ therapie*, ad partium *solidarum* læsiones, & cum his complicata *humorum* damna, pertinentis: neque verò etiam ullò modò negligant discere, quantum prudentissima contemplatione, imò oculari inspectione operationum, usquam fieri potest, veram *rationem* ipsarum *strictè* dictæ *Chirurgiæ administrationum*: ut ad illas partim prudenter referre intelligant, quicquid ex *anatomia*, has verè respicere potest: partim etiam supervacuis, & purè speculativis, illis præjudiciis, exuere possint animum, quæ sæpenumerò, ubi nullum subest solidum periculum, tamen mentem *timore* & *solicita dubitatione* suspendere & percellere solent. In quem finem certè ambire debent studii Medici adhuc *sectatores*, occasiones videndi generosiores illas, ut vulgo vocant, operationes, *membrorum amputationem*, *lithotomiam*, *herniotomiam*, *vulnorum grandiorum tractationes*, & gratis ad hanc classem referri solitam, *actualium cauteriorum* administrationem. De qua ultimâ non possumus, quin adhuc paucis verbis dicamus, quod inanis illa formido, tanquam *horribilis* alicujus operationis, & quasi universalis *substitutio potentialium* caute-

riorum, in variis casibus reverà, nisi cum prudentissimò moderamine applicentur, majoribus incommodis ægròs exponat, & effectus etiam aliquos ab igne expectandos, nequaquam assequatur: quale quid in *Carbunculis pestilentibus*, reverà ita evenire, pro certissimo habemus, quod nempe *actualis inustio*, nimio ~~plur~~ boni effectus in illis polliceatur, quam ulla *corrosiva cauteria*.

LVIII.

Ita enim demum cum pondere & fiduciâ, *limites* suos discernere integrum erit *Medico*, intra quos *Chirurgi* sese continere debeant: & testatur hoc experientia, quod etiam *peritiores* quilibet *Chirugi*, optimam existimationem pro *Medico* concipiant, & auctoritati ejus humaniter auscultent, quando illum, è *veris* & *pragmaticis* fundamentis, de suis negotiis aliquid monere audiunt, quod dignum sit observatu. Habebunt autem simul *Chirurgi* sanè affatim, quod rectè *discant*, ad prudentem operationem suarum manualiam directionem & executionem: tantò magis autem, ad *manualis* potius exercitii atque *dexteritatis habitum* acquirendum, eique incumbendum: dum ex adverso, confusâ illa discendi *Amethodiâ*, plus communiter sibi tribuere inducuntur, è *Medicis therapeuticiis*, ad reliquam *Chirurgiam* referendis, *Empiriis*, quàm ut propriis suis, *manualibus* operationibus, cum debitâ curâ justam operam impenderent. Adeò, ut certè consultissimum duceremus, positivè potius, juniores adhuc & minus exercitatos *Chirurgo*s, à *Therapia Medico-chirurgica* seriò arce-re, eisque illâ interdicerè, neque ejus liberiores usum ullis aliis permittere, nedum committere, quam qui *propriæ* suæ *artis* exactiore *peritiâ* jam conspicui, simul *moderationis*, *judiciose discretionis*, & *prudentiæ*, insignem fiduciam promereri observantur. Felicissimè autem hoc, morali certitudine, procedet, si etiam *Medici* bono exemplo illis præeant.

Ita quidem proposito nostro, quantum à nobis expectari usquam poterat, nos perfunctos esse, confidentes, Divinæ elementiae supplicamus, ut illis de quibus egimus coëptis atque scopis, ex alto benedicat: interea pro præstita nobis gra-

tia, humillimas laudes. Ipsi nuncupantes.

S. D. G.